



INATSIARTUT

**Decembarip aappaaniit arfernanut 2024 Ilaqutariinnermut
Peqqissutsimullu Ataatsimiititaliap Danmarkimi paasisassarsiorluni
angalanera**

Paasisassarsiorluni angalanermi ilaasortat peqataasut:

Mala Høy Kúko, Siulittaasoq

Anna Wangenheim, siulittaasup tullia

Doris J Jensen

Dines Mikaelson

Mikivsuk Thomassen

Ullut angalaffiusut:

Marlunngorneq decembarip aappaat aamma tallimanngorneq decembarip arfernat

Marlunngorneq decembarip pingajuat 2024 tarnimikkut napparsimasut pinerluuteqarsimasut immikkoortortaannut R3-mut Århusimiittumut pulaarneq

Ataatsimiititaliap ulloq tamangajaat Århusimut Århusimiillu qimutsuinik angalanermut atorpaa. Immikkoortortami aqutsisut suleqatiginerisigut pulaarnissaq aaqqissuunneqarpoq, pulaarnermi immikkoortortami nakorsaaneq, tarnip pissusiinik ilisimasalittut immikkut ilinniarsimasutut aqutsisoq aammalu peqqissaasuuneq naapinneqarput kiisalu immikkoortortami takornariartitsisoqarluni.

Tarnimikkut napparsimasut pinerluuteqarsimasut pillugit immikkut sullissinerup suunera aammalu qanoq unititsisoqartarnera qanorlu nappaatit suussusersiniartarneri pillugit ataatsimiititaliaq paasisutissanik pissarsivoq. Immikkoortorta qarfiup aaqqissuussaanera, sulisoqarneq aammalu kalaallit peqqinnissaqarfianik suleqateqarneq pillugit aqutsisut oqaluttuarput. Immikkoortorta qarfik 16-inik siniffittaqarpoq aammalu nakorsanut, peqqissaasunut allanullu attuumassuteqartunik ilinniagalinnut atuartitaanikkut ilinniarfiusarluni.

Takornariartinneqarnermi ullormut sammineqartartut tamaasa pillugit ataatsimiititaliaq ilisimatinneqarpoq aammalu immikkoortorta qarfiup atortorissaarutai initigullu atugassarititat pillugit paasisaqarfigilluarlugu.

Uninngasut ataatsimiititaliami ilaasortat naapinnissaat kissaatigisimammassuk pulaarneq naggaserlugu uninngasut pulaarneqarput.



Pingasunngorneq decembarip sisamaat 2024 Folketingimut Københavniimiittumut pulaarneq

Folketingimi Kalaallit Nunaanut Ataatsimiititaliami, Isumaginninnermut Ataatsimiititaliami aammalu Ilaqutariinnermut Ataatsimiititaliami ilaasortat naapinneqarput. Tikilluaqqusinikkut ataatsimoorlunilu imminut ilisartinnikkut ataatsimiinneq aallartinneqarpoq. Tamatuma kingorna sammisat tulleriiaakkat uku qaqilerneqarput:

- Meeqqat kalaaliusut pinngitsaaliisummik inissinneqartarneri, angajoqqaatut piginnaasat pillugit misissuut, kommunit akisussaaffeqarfii kiisalu politikkikkut malinnaanissap ineriartuutaasumillu suleqatigiinnissap pisariaqarneri eqqartorneqarput.
- Peqqinnissaqarfiup suliaqarfittut tiguneqarnikuunera naatsumik eqqartorneqarpoq.
- Tarnimikkut napparsimasut pinerluuteqarsimasut kalaaliusut uninngasut aammalu uninngasut nutaamik pinerluuteqaraangata akiliisussaataitaneq eqqartuisoqarput.



Sisamanngorneq decembarip tallimaat 2024 Kalaallit Peqqissartut Illuannut K benhavnimiittumut pulaarneq

Kalaallit Peqqissartut Illuanni pisortaq, sullissinermut pisortaq aammalu illumi ineriartortitsinermut peqqissaasoq ataatsimiititaliamit ataatsimeeqatigineqarput.

Illup aqqissuussaanera, sammisassat aammalu initigut atugassarititat pillugit aqutsisoq ilisimatitsivoq. Ataatsimiititaliami ilaasortat itisiliillutik apeqquteqarnissaminnut periarfissinneqarput. Illup ingerlanneqarnera, ilaatigut inissakilliorneq, illup atuartitaanikkut ilinniarfiusarnera, Kalaallit Nunaanni peqqinnissaqarnikkut suliffeqarfinnik, kommunit suleqatigineqarneri assigiissaallu pillugit ataatsimiititaliaq annertuumik paasisaqarpoq.

Tamatuma kingorna ataatsimiititaliami ilaasortat illumi napparsimasutut uninngasut/najugallit naapinnissaannut periarfissinneqarput, pulaarnermilu ammaneq, soqutiginninneq oqaloqatigiinnerlu misigineqartut pillugit ataatsimiititaliaq qujassuteqarpoq.

